



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : f Tir Yimym

tir_yimym

tir yimym

TAPAK 7

**Rahul Gandhi-i Delhi police station
kima mener longkak ait**

**Imran Khan temang reprangba
sülen tepuokdaki meyipa yokogo**

VOL. XXIII ISSUE NO. 310 (ADOK 310) DIMAPUR KÜPTOKNÜ (SATURDAY) LUROI (AUGUST) 22, 2026 ₹ 5.00

Meghalaya nung tensa mejungi küma lir

Shillong, August 21, 2026 (Agencies): Shillong nung Khasi Students' Union ajanga black-flag bike rally ayonga agidang rara adokba sülen anogo ana lir Meghalaya nung ano August 21 nü tensa mejungi kümogo.

Hokolbarnep 5:00 ako meta Lachumiere nung taoba National People's Party office ka petrol bomb amshia amak saka mapok ta police-i ashi. Iba tatalokba sülen police aser forensic team kati kulitem bendena ken o ka benokogo.

West Khasi Hills nunga yasüing Nongstoin nung sorkar gari ana rongdoktsü. Maneni Mawkhlam nung PWD Superintending Engineer office aser Mawshynrut Civil Sub-Division SDO office nung petrol bombs yoka pokdaktsü.

Yasüing 9:30 ako meta Shillong nunga Nongmensong police outpost nung petrol bomb ka pokdaktsü saka iba lendong nung nisung yiruyibong maliasü.

Ri-Bhoi nunga tanep 2:00 ako meta Water Resources Department office nung sorkar gari ana aser motorcycle ka nung mi senoktsü.

South West Khasi Hills nung anepdang 1:00 ako meta Mawlangwir nung Animal Husbandry and Veterinary Officer office nung petrol bomb ka pokdaktsü.

Centre-i August 25 tashi Meghalaya nung central forces company 5 mapa lemsütsütsü mulunga agizükogo. Meghalaya state police den yariteptsü atema

CRPF company pezü aser Rapid Action Force ka mapa lemsütsütsü. Bodbarne Shillong nung ozüing alema inyaksangshiba atema police-i FIR 15 benokogo ta East Khasi Hills Superintendent of Police Vivek Syiem-i ashi.

Iba ajanga Assam aser Meghalaya tsüingda senzusenbong nunga tetsükdaktsü ajurua lir. Hokolbar nungi state anatsülen nungi Byrnihat-Jorabat road mokdangogo aser iba ya Meghalaya aser Assam nungi taxi operators tekong merangtepba ajanga lir.

Tensa mejungi aliba mapang Meghalaya Chief Minister Conrad K Sangma aser Assam Chief Minister Himanta Biswa Sarma nati tensa süngjemdaktsü aser yimjung bener arutsü atema külemi inyaka aotsü mulungtepogo.

Meghalaya Deputy Chief Minister Sniawbhalang Dhar aser Assam Cabinet Minister Atul Bora na nem inter-ministerial senden ka mena olemteptsü atema mapa lemsütsütsü.

Bodbarne tatalokba dak sendakba nung police-i Khasi Students' Union (KSU) tanishir asem pua lir aser par asem Shillong nungi tangalení anienogo.

KSU president Raymond Kharjana East Garo Hills nung Williamnagar District Jail-i yok aser vice-president Pynkmenlang Sanmiet o general secretary Reuben Najjar na West Garo Hills nung Tura District Jail-i anir ogo.

Victo Sema-i Mkg District Jail semdang

Mokokchung, 21st Aug (TYO): Aug 21 nü Principal District & Sessions Judge-cum-Chairman, Mokokchung District Legal Services Authority, Victo Sema lenisüba nung 3rd Quarter Periodic District Jail semdangba mapa agiogo ta osang ka ajanga metetdaktsü.

Iba mapa nung Kumdilon Kessen (Chief Judicial Magistrate-cum-Secretary, MDLSA), Dr. Madhavi R, IAS (Assistant Commissioner), I. Bunglang Chang (Addl. SP), Rongsentoshi Jamir (Youth Resource Dept), Molo Jamir (Panel Lawyer, MDLSA) aser Chubarenla (Panel Lawyer, MDLSA) nungeri yaritep.

Taoba inspection May 12, 2026 nung agi aser idangji reprangtebatem indang mapa akümba-makümba asadangtepa liasü. DIG dang district jail nung sentry post aser atsü (jara) koba telaor dang lir, item nüngdakbaji tekaratiba nung yanglutsü asoshi shity zülutsü lemteta liasü ta osang ajanga metetdaktsü.

Computer literacy training dak sentakba nung jembidang, tepuokdak alirtem nem training shitak agütsütsü atema Industrial

Training Institute (ITI) den külemi senteper inyaksü asoshi tongteprateptsü lemtet.

Taoba District Planning & Development Board (DPDB) senden nung agizükba jail campus telung nung tetsüing lenmang yanglutsü atema onükji DPDB mendenbuba den tongteprateptsü lemtet, ta parnokisa metetdaktsü.

Ano, tepuokdak alirtem atema Chief Medical Officer (CMO) den psychiatrist service atema tongtepratepa lenmang kar bushitsü telemtepa agiogo.

Tatensa, tepuokdak alirtem sempet renlokba tsütsü (skill development) pei-i jangraba nung odaktsütsü atema district industries centre office den tongtepa teyari lenmang kar bushitsütsü lemtetogo.

Tanü Department of Youth Resources-i tepuokdak alirtem temang aser tekolok junga alitsü asoshi volleyball ball ana den net ka aser football ball asem tenla.

Iba inspection nung tepuokdak alirtem kümzüka ayutsü aser ajak junga alitsü asoshi tekaratiba nung item telemtepa agidaktsütsü asoshi ketdangsertem dang mepishia liasü.

Aor yimsüsürtemi Impur nung Clean Election atema shisalemsatep



Impur, Luroi/August 21 (TYO): Ao Baptist Arogo Mungdang (ABAM) Social Concern Ministry ajanga tanü Centenial Hall, Impur nung "Clean Election" dak rangloker Yimden Yimsüsür den Mensem ka kaogo.

Iba sentong nung Ao Lima yimsüing 56 aser town ward 16 nungi yimsüsür 373 adenshia iba Clean Election onük nung ajemdaker yimsüsürtemi pei tangatetba lemsatepba den Aor-i Clean Election dak rangloker teinyaktsütem aika taroki yiagi lemsatep.

Sentong nung ABAM Executive Secretary Rev. Temsü Jamir ajanga tarur pela-agizükba den külemi iba mensem jazükba indang lemsatepdang Ao lima lokti nung tebilemtsü aika rongnung election ya lir. Iba tebilemtsü ya aroki yaritepa inyaksü asoshi yimsüsür nungi shisa aginer. Naga lima nung mezüingbuba political party NNO aser UDF tenzüker asen Naga lima election mapang mepetmesü, raratepba, azüdokshiba, sen yong vote yoktepba aser alitepba, tashiyim agi polling booth coup asüba tenzü. Iba yongji NBCC ajanga

1973 küm arogotem dangi election mapang ozüing akhümsübua timi election agitsü tayongzüka agütsü. Iba dak ajemdaker Ao Baptist Arogo Mungdanga iba mapang nungi tenzüka election merüka agitsü asoshi inyaka arudar aser Clean Election Coordinator ana küm 5 atema shimmer sarasadema mapatong temzüka odagi aser yangji yimsüsürtem teyari medeni motettsü ta lemsatep.

Iba mensem jazükba ya Clean Election mapatong atema yimsüsürtem ola angadangsü aser teka amteper Ao lima yanglutsü tangatetba lir. ABAM nung tenzükertemi yimsüsürtem iba mensem jaokba ya yimsüsürtem dak nungi teimla tulu anguba agi jaokako ta ABAM Executive Secretary-isa adenshia aliba yimsüsürtem ayongzü.

Tanü iba mensem sentong nung "Election Merüka Agiyim" ta asüba onük nung ajemdaker shisalen sayur Dr. Panger Kichu-i jembidang tangar kini aiben Aor-i kechia shir ta asür, saka kanga dang tesasatsükaji tensa aser mapa aika nung asenokji atsükshishia jajatsü-ang akümer, aser ibaji tangar tai masü saka

asenok tai lir ta ashi.

Naga lima nung election agidang mapa tamajung ajakji Aor-i tenzü, anungji ano election nung mapa tajung inyaka tajungleni melenshitsuja Aor-i tenzüki arung ta adenshia aliba yimsüsürtem ayongzü.

Paisa Clean Election mapatong atema inyaksü asoshi NBCC aser ABAM dak alaka tanga telok mali, anungji Ao lima nungi Clean Election mapatong inyaksü atema mulungtet telok ka adoktsüla. Tongtipangsa Naga lima nung Clean Election mapatong ya asenok Aor-i inyakba nung süngjang tanga sayutsüla ta lemsatep.

Dr. Pangerisa Laishiba nung kaket balala nung tapu aser tekong balala bener arua medemdanga Clean Election mapatong nung Tsüngremer shisatsü agia inyaka takok angutsü lemsatepa liasü.

ABAM nung Finance & Property Secretary Wb. Maong Jamir-i Tsüngrem lenisüba jazüka sarasademar sentong tenzüka aser ABAM Women Ministry Secretary Wt. T. Arenla Longkumer ketdangsüba nung iba sentong agia liasü.

ECL Secretary-i Dimapur nung SIR maparen reprangshi

Dimapur, August 21, 2026 (TYO): August 21, 2026 nü Deputy Commissioner Office, Dimapur nung tang teinyakdak Special Intensive Revision (SIR) meyipa reprangshiba senden ka menogo.

Iba senden ya Secretary, Election Commission of India, Binod Kumar lia amen aser Deputy Commissioner & District Election Officer, Dr. Tinojongshi Chang-i PowerPoint presentation ka ajanga SIR exercise inyaka aruba osang lemsatep.

Binod Kumar-i jembidang Enumeration Forms (EFs) kanga tongtipang ta ashiba den Electoral Registration Officers (EROs) aser Assistant Electoral

Registration Officers (AEROs)-i field level nung Booth Level Officers (BLOs) mapa jungjunga reprangtsü nenshia ashi.

Binod Kumar-isa election ketdangsürtem ajurutepa sensaksem aser field level nung tayongzüka ajurubatem meyipa reprangshitepa liasü.

BLOs dang jungjunga jangjashiteptsü aser mapping asütsü aser bangdak electoral ketdangsürtem den amalitepa mapa inyaksü ayongzü.

Secretary Binod-isa DEOs, EROs, AEROs aser BLOs dang mapang shitak nung amalitepa maparen tembangtsü aser alizüing atongtsü nenshia metetdaktsü.

Dimapur kübok Assembly

Constituencies (ACs) asem nungi BLOs kar shimteta iba senden nung aden. Dimapur-IAC kübok Khel Chakhesang Colony E/W, Bank Colony aser Pranab Vidyapith School Area, Dimapur-II AC kübok Duncan Village "B" N/W, Industrial Village/ Razphuphe-1 DC, Zeliangrong "A" aser Government Higher Secondary School aser Dimapur-III AC kübok Toulazouma, Toulazouma-I aser Longsen nungi BLOs shimteta liasü.

Iba senden amenba sülen Binod Kumar-i 3-Dimapur-III Assembly Constituency kübok polling station ana semdanga SIR exercise aser field-level mapa asadang liasü.

Niuland nung SIR indang awareness sentong ayongzük

Dimapur, Luroi/August 21 (TYO): Niuland District Administration ajanga Special Intensive Revision of Electoral Roll 2026 indang awareness sentong ka August 21, 2026 nü Deputy Commissioner, Niuland indang Conference Hall nung agia liasü.

Nüburtem nem Election Commission of India ajanga electoral roll indang Special Intensive Revision tenzüka aliba indang awareness agütsütsü nükjiding nung iba sentong ya ayongzük.

Additional Deputy Commissioner Niuland, Athsangla-i pela agizükba o jembidang, temsüa aliba senso ajunga electoral roll nung inokdaksütsü aser metemsüba mesüra duplicate voters tem indoktsü asoshi iba sentong ya ayongzük, ta ashi.

Niuland ya full-fledged administrative district saka

election office temeja makai lir, ta ADC-i jangjatsü. Election Commission of India aser Chief Electoral Officer, Nagaland ajanga melaba ama Niuland nung election dak sendakba maparen ajak Chümoukedima district kübok inyaker, ta lai metetdaksü.

ADC & ERO, Chumoukedima, T Lemlila Sangtam ajanga SIR 2026 indang onük nung ajemdaker jembidang, senden nung dena aliba lenir ajunga dang temsüa aliba votes kata mesendktsü aser election ketdangsür nem osang ajak shidak agütsütsü ayongzüka liasü.

Electoral mürekba ajanga dang election mürektetsü ta lai ashi. ADC & ERO Medziphema, James Swu-i SIR 2005 aser 2026 inyakba indang lemsatop aser züngsemtem dang Electoral Officers den amalitep akatsü aser yariteptsü aser

akok tashi tekeraba nung temsüa aliba voter ajunga zülüokdaksütsü ayongzük.

Tang amshiba enumeration form (EF) drive nung temsüa aliba voters tem documents magütsüetba mechi tenüng mezülüoki metoktsütsüla, ta pai jangjatsü.

Passport kechi südir süaka amshitsüla aser tanga nüngdakba documents tem election ketdangsür temi jangjatsü atema ajaba mapang sayutsüla, ta ADC ajanga ashi.

Meyietele, Assistant Programmer Election Branch ajanga SIR schedule, Enumeration process aser maparen balala inyaksü aliba indang tongmelang agi lemsatop. Senden nung EAC & AERO 4 Ghaspani-1, Omegali menden liasü aser Aghunaqa area nung polling stations agi meperiba indanga senden nung jembia liasü.

Dimapur Forest Division aser 90.8 Hills FM tsüngta MoU zülutep

Dimapur, Luroi/August 21 (TYO): Arem, arem shiruru aser libajen wazüka ayuba nung nüburtem nem awareness agütsütsü aser osangtsüsang prokshitsü atema maneni lungjemer inyaksü atema Dimapur Forest Division aser 90.8 Hills FM tsüngta Memorandum of Understanding (MoU) ka zülutepa liasü.

Iba MoU ya August 20, 2026 nü Dimapur Forest Division nung zülutepa August 2026 nungi January 2027 tashi ita trok teka amteper inyakba tezüka liasü.

Iba partnership ya ajanga 90.8 Hills FM aser Dimapur Forest Division külemi lungjemer Forest Division ajanga arem aser aremshiruru wazüka ayuba, biodiversity,

environmental awareness aser tanga inyakyim indang osangtsüsang prokshiba nung tashi itshtitsü atema külemi inyaksü.

Parnok lungjemer nüburtem den osangtsüsang prokshiba nung yaritsü atema community radio aser digital communication amshitsü.

Agency ana lungjemba ya tang tasen masü aser arem aser libajen dak sendakba maparen ajunga nüburtem dangi yimya tajungba nung bener arutsüba nung teka amteper inyaka arur.

Iba MoU zülutepba nungia Dimapur Forest Division aser 90.8 Hills FM nungi ketdangsürtem dena liasü. 90.8 Hills FM - The Voice of Change ya Nagaland nung mezüngbuba community radio station lir.

Chümoukedima nung SIR 2026 inyakyim asadang

Dimapur, Luroi/August 21 (TYO): Secretary, Election Commission of India, Binod Kumar-i Chümoukedima district nung Special Intensive Revision (SIR) 2026 inyakba asadanga senden ka Deputy Commissioner, Chümoukedima indang Conference Hall nung August 20, 2026 nü mena liasü.

Iba senden ya Deputy Commissioner & District Election Officer, Chümoukedima, Polan John, NCS lenisüba kübok amen, kong Chief Electoral Officer's Office nungi ketdangsürtem, 4-Ghaspani-I aser 5-Ghaspani-II Assembly Constituencies nungi EROs aser AEROs aser tanga ketdangsürtem dena liasü.

Iba senden nung Binod Kumar-i ketdangsürtem dang mapang shidak nung SIR dak sendakba maparen ajak renemtsü ayongzüka liasü. Paisa BLOs temi timtem ajuruba atema lenmang bushiteptsü ayongzük aser district tesem ajungalen nüburtem nem awareness aser osang agütsütsü tongtipang lir ta ashi.

BLOs temi mapa inyakba atema Kumar-i pelaba lemsatop

aser mapang shidak nung parnoki bushitetba tem metetdaksütsü ayongzük. Pai parnok dang mapa saksalema inyaksü aser temsüa aliba voters ajunga electoral roll nung shidak inoktsü ajungmeso.

Iba SIR exercise yagi küm aika maparen balala nung aotsü, anungji ajaki meranga inyaksüla, teti tensa asadangtsüla aser mepetmesü ajangshiba tem mapang shidak nung bentettsüla, ta Binod Kumar-i ashi.

Deputy Commissioner, Chümoukedima, Polan John, NCS ajanga district profile indang presentation tejangja agütsü aser iba mapang electors kwi ali, polling stations, rationalization of polling stations, aser SIR 2026 dak sendakba nung training aser awareness agütsüba ajunga awajema liasü.

Iba senden nung SIR inyakba indang osang tejangja agitepa jembishinüa liasü. Ketdangsür aser BLOs temi Secretary dang field exercise mapang timtem ajuruba indang ashi aser iba exercise tajungtiba nung agitettsü asoshi lenmangtem sayutepa liasü.

Nagaland Angh-i NIELIT Kohima semdang

Dimapur, Luroi/August 21 (TYO): Nagaland Angh Nand Kishore Yadav-i August 20, 2026 nü National Institute of Electronics and Information Technology (NIELIT), Kohima semdanga liasü.

Iba mapang Angh-i Academic Block nung infrastructure facilities balala repranga jaja aser Cyber Forensic R&D Lab nung aliba facilities aser maparen balala inyakba angazüka liasü.

Kasa mapang Angh-i startups ana, Kora aser Zodmo Technologies Private Limited semzükja Nagaland nung lanurtem dak entrepreneurship, technology aser innovations tanüla ainba asangsang nung ngua liasü.

Iba startups ana semzükba ajanga state nung nüburtemi nüngdakba asoshi technology

amshia solutions agütsütsü mangdang aliba sayur aser digital economy nung maongka tasen agütsür.

Talisa Zodmo Technologies yagi online marketplace nung rangloker, kong tamshir temi Nagaland telungzük nung goods aser services tem aliteter, yokteter, amshiteter aser bushiteter.

Angh-i parnok den sensaksemba ajanga lanur entrepreneurs aser innovators tem ajungshitsü tongtipang ta sayur.

Iba sülen Angh dang NIELIT Kohima nung maparen balala inyakba indang rateta shia liasü. Pai iba tesem semdangba ajanga institute-i state nung digital skills, technology, innovation aser capacity building tsütsü shilem tulu agiba tali tejangjaba nung angatettsü maongka tajung agütsü.

RCM-i CMO Mokokchung nem mozü agütsü



Mokokchung, Luroi/August 21 (TYO): Rotary Club Mokokchung (RCM) tenzüker 2027 nung küm 50 ajungtsü aliba jubilee nüngtem nung parnoki küm piyong maparen balala inyaka arudar. Aji oda parnoki Hokulbarnü Chief Medical Officer (CMO), Mokokchung nem nüngdakaba

nübur yaritsü asoshi mozü kar tenla agütsüogo, ta Club osang ka ajanga metetdaksü.

Rotary Club Mokokchung secretary Rtn. Imlitemsu Jamir-i anir par club züngsemtemi paracetamol drops mozü bongdang noklang pungu (500) CMO office nem routine immunization sentong

agiba mapang lemshitsü asoshi agütsüogo, ta osang ajangasa ashi.

Iba sentong ya tongtibangsa tetsür tanur anema aliba tsütsü ajungshia aser tanurtem nem mapang shitak nung vaccine agütsütsü nükjiding yur inyakba ka lir, ta club-isa metetdaksü.

GOVERNMENT OF NAGALAND

DIRECTORATE OF FOOD PROCESSING

NAGALAND: KOHIMA

NO.FP/PROMO/5/2026

Dated Kohima, the 21st August, 2026.

FINANCIAL ASSISTANCE TO SET UP MULTIPRODUCT FOOD IRRADIATION UNITS NOTICE FOR INVITATION OF PROPOSALS

In pursuance to the Ministry of Food Processing Industries (MoFPI), GoI, D.O. letter No.C-13015/1/2026-Cold Chain dated 12.08.2026, proposals are invited from prospective entrepreneurs belonging to General Category, Scheduled Caste(SC), Scheduled Tribe(ST) and North Eastern Region (NER) undercomponent scheme -"Integrated Cold Chain & Value Addition Infrastructure (Cold Chainscheme) - Support to setting up of multiproduct food irradiation units" of "Pradhan MantriKisan Sampada Yojana" as per the respective scheme guidelines dated 06th August, 2024 (available at <https://www.mofpi.gov.in>). Under PMKSY Cold Chain Scheme, MoFPI isproviding financial support for multi product irradiation unit at 35% (General) or 50%(Difficult SC/ST/FPOs/SHGs) of project cost, capped at Rs. 10/-Crore for individualFPOs/FPCs/SHGs/NGOs/PSUs/Firm/Companies/ Govt. bodies.

- The entities are required to submit their proposals online only at <https://www.sampada-mofpi.gov.in/> with relevant details (under appropriate headings) under "Pradhan Mantri Kisan SAMPDA YOJANA".
- No physical submission of proposals or through any other means shall be accepted.
- The last date for submitting applications is 17:00 hrs. on 31st August, 2026.

Sd/-

Y. Chingak Konyak, NCS
Director of Food Processing

Rahul Gandhi-i Delhi police station kima mener longkak ait



New Delhi, Luroi/August 21 (Agencies): Lok Sabha nung Opposition lenir Rahul Gandhi-i, Hokolbarnü Delhi kübok Parliament Street nung Deputy Commissioner of Police office kima mener longkak ait. Taoba ita shisaluyim nung temelenshi bener arutsü atema longkak aitba mapang pellet-gun agi yirutsüba kaketshir kati FIR benokba magizükba atema Gandhi-i longkak aita liasü. Gandhi aser kaketshir sang na ya police station-i ao. Iba kaketshir yagi ken o benoktsü

merangba tamakok ngua liasü, ta Congress-i ashi. Gandhi-i, "Sahil-i ochiobendang atema FIR ka benoknua liasü saka temelaba magütsü. Iba ya Constitution aser constitutional temedentem ajemshiba lir," ta ashi. Iba taitsuba dak sendakba nung Delhi Police-i kecha telangzüba agüja mali. Congress-i ashiba agi, iba kaketshir aser pa okatsür na August 14 nü Delhi Police nem tezüluba nung tashishiba ka

agütsütsü atema ao aser iba sülen anogo asem lir odang saka kecha jenjang magi liasü. Party-i ashiba agi, iba kaketshir ya Gandhi-i meiner Hokolbarnü police station-i ao, saka DCP-i I/O number ka magütsü. Congress-i ashiba agi, iba tatalokba ya alibelen tulu ka lir anungji FIR benoktsü nüngdaker. July 20 nü CJP pur longkak aitba mapang pellet gun amshiba dak ajemdaker opposition aser CJP nati Delhi Police nongshia arudar.

Haryana nung kaketshir lokti ana mangatetep adok; nisung 2 asü

New Delhi, Luroi/August 21 (Agencies): Hokolbarnü nikongtsütsü Haryana kübok Rewari nung kaketshir telok ana aser parnok medemertem tsüngda tilateri nung mangatetep adokba sülen nisung ana tepset aser ka yirua liasü. Iba lendong ya Gokalpur yimtsüng nung atalok. Indira Gandhi University (IGU) kikümtong nung mangatetep adokba sülen telok kati intong amer nisung asem areshia liasü, ta police-i ashi. Police-i asüsang ana ya Mandya yimtsüng nungi Jatin (22) aser Niganiyawas nungi Himesh (20) ta jangjaogo.

Jatin ya Rewari nung company ka nung inyaker aser Himesh ya Kishan Lal College nung azünger, Yirur alisang ya Budhana yimtsüng nungi Yashpal (21) ta jangjaogo, aser pa mozüki ka nung temang anepaludar. Police ketdangsür kati ashiba agi, parnok asem ya motorcycle ka nung oya aliba mapang ken o nung temulung melemi bilemertem yagi arishia oa Gokalpur nung parnok indang gari agi tsükoktsü. "Parnok balance raksar lenmang nung alang aser iba sülen item nisungtem yagi intong, süng aser hadir techira

agi züker jena ao," ta pai ashiba den, Jatin aser Himesh na iba tesem nung süatok, ta shisem. Tenük kuli agütsürtemi ashiba agi, telok ana tsüngda university kikümtong nung mangatetep adoka liasü. "Iba sülen nisung aika parnok indang registration plate tem tape agi nembanger motorcycle nung mener aru. Parnok ya asür ana aser yirur alisang pusemertem liasü. Telok anapronglai süng aser hadir techira bener liasü," ta ketdangsür yagi ashi. Police-i ashiba agi, parnoki temulung melemi bilemertem takaratiba nung aputsü merangdar aser Sadar police station nung nisung tepsetba ken o ka benokogo.



Mumbai kübok Kurla East nung ozüng alema yanglur aliba kiojen balala raksatsüyonga aotsü atema renemshiba mapang crane ka ki ka nung tsükba sülen ita asem kinü tanur ka densema nisung ter yiruogo. Brihanmumbai Municipal Corporation (BMC) ketdangsür kati ashiba agi, Poclain machine ka ajungkettsü atema hydraulic crane ka amshia liasü.

CJP-i Rajasthan education minister nem takhangba ka agütsü

New Delhi, Luroi/August 21 (Agencies): Jaipur nung Cockroach Janata Party (CJP)-i school ka semdangba mapang parnok volunteer tem amakertem aputsü atema CJP-i Rajasthan education minister Madan Dilawar nem ghonda 48 atakzüksüogo. Parnok takhangba mataloktsüra state ajunga nung longkak aitba sentong ka ayongzüksü aser pa mapa nungi anentsü atema takhangba agütsütsü, ta CJP-i ashi. CJP co-convenor Ashutosh Ranka-i, iba sorkar school ya küm aika chang metsüba tesem ka nung amendaker inyaksangshia arudar ta ashiba den, party indang team ka iba tesem semdangi aoba mapang parnok maka liasü ta ashi. "Onok Rampura-Kanwarpura yimtsüng nung school ka semdangi ao. Tesüiba küm aika iba school ya chang metsüba tesem ka nung amendaker inyaksangshia arudar. Onok taoba küma iba school asadangi ogo aser iba mapanga chang metsüba tesem ka nung amendaker inyaksangshia liasü," ta Ranka-i PTI dang ashi. Ranka-isa, CJP temam iba tesem tonga mao tsüngda BJP kübok inyakertembo tongatoker

liasü, ta ashiba den, item nisungtem yagi party volunteer tem dak azük, ta ashi. Paisa, gari aina jaksatsü, phone tem raksatsü aser tetsüra ka daka teka sangshia liasü, ta ashi. "Police nem osang agütsüogo, saka onok iba tesem tonga aoba sülena parnoki manen. Gari window aser phone tem raksatsü, tetsür ka dak azük, kü tola-a shisatsü aser onok rongnung ka teka raksaja liasü. Parnoki onok dak long agia aon," ta pai ashi. Dilawar den jembiba mapang Ranka-i, "nü nem ghonda 48 agütsür. Item nisungtem ya aputsüla. Nai order agintsüla, ajita mesüra onoki Rajasthan ajunga nung longkak aitba sentong ayongzüksü," ta ashi. Ranka-isa, longkak aitba sentong ya school ken o atema dang masütsü saka CJP-i education minister mapa nungi anentsü atema takhangba agütsütsü, ta ashi. CJP ngutetsang Abhijeet Dipke-ia pa Jaipur-i oa mener longkak aitba sentong nung shilem agitsü, ta shiogo. "Ghonda 48 tsüngda school meyanglushira aser BJP züngsemtem ya mepura, onoki odangbo metoktsütsü," ta pai shisem.

SHIVALIK SMALL FINANCE BANK LTD.

Registered Office : 501, Salcon Aurnum, Jasola District Centre, New Delhi - 110025
CIN : U65900DL2020PLC366027

AUCTION OSANG

Shivalik Small Finance Bank Ltd. nung sen apuba item senpurtem dang Bank-i jurila osang agütsüba densema takhangba balala agüjaka nenoki Bank nungi Gold Loan/s agiba maoteti lir. Anungji sen apur ajak dang security ama bank-i yua aliba Gold ornament tem ajak loan agiba bank nung 11:00 ako nungi tenzüka auction asütsü atema telemtetba agiogo. Sen apur aser account holder tem aser nüburtemi auction indang terms aser condition tem dak ajemdaker auction nung shilem agitettsü.

Auction date is 29-08-2026 @ 11:00 am.

S. NO	Branch	Account No.	Actt Holder name
1	INDIRAPURAM	101942527492	T H CHANG

Auction nungi account mashika entoktsü mesüra jelia osang magütsüi acution ya athitsü asoshi bank dak tashi lir.
Authorised Officer, Shivalik Small Finance Bank Ltd.

Form No. 3
[See Regulation-13 (1)(a)]

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 337 / 2026

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No. 6495

BANK OF BARODA

- VS -

M/S. B & B ELECTRICALS & Ors.

To,

(1) MR. DEBASHISH KUMAR BARMAN (D NO.- 3)
Son of Tapan Kumar Barman, Resident of House No. 210, West Yard Colony, Dimapur Sadar, Dimapur, Nagaland- 797112.

JAOKER

03-08-2026 nü Hon'ble Presiding Officer / Registrar matsüngdang OA / 337 / 2026 list sütsüogo.

Naia pua aliba sentsüh sen 94,55,046.48 (application den kuli kakety copy tem. annexed) meyipa agitsü atema Act kübok section 19(4) dak ajemdaker iba Tribunal yagi shisema aliba Application dak sendakba nung summons/ notice agütsür.

Act kübok section 19 nung sub-section (4) dak ajemdaker defendant tem nem iba tetuyuba agütsür.

(i) Osang agütsüba sülen anogo semer tsungda temepishiba ya kechiba magizüktsüla iba indang osang agütsütsüla;

(ii) original application kübok serial number 3A nung applicant-i shisema aliba kiojen aser rongsen balala dak alaka tanga kiojen aser rongsen ajak metetdaksütsü tuyur;

(iii) Ken o bangdaka aliba mapang aser kiojentem attachment atema application magintsü tashi original application kübok serial number 3A nung shisema aliba kiojen kecha tsütatetep masütsü mesüra mayoktsü metetdaksür;

(iv) Tribunal-i temelaba magütsüi nai security interest creat süa aliba mesüra original application kübok serial number 3A nung shisema aliba kiojentem kecha mayoktsü, lease masütsü mesüra iba dak sendakba nung kecha jenjang magitsüla;

(v) Secure süa aliba kiojentem yoka iba amala kiojen atema security interestbena aliba bank mesüra financial institutions indang account nung minoktsütsüla

Maneni nai temalen shisema applicant nem agüja aliba copy ka den tezüluba nung statement ka agütsütsüla aser 11-09-2026 nü 10:30 ako nung Registrar matsüngdang nokdaksü tetuyuba agütsür. Tuyuba ama minyaktetra na medenaka application ya angadangsü aser telemtetba agitsü.

Paper Book atema iba sülen anidakang Url: <https://cis.drt.gov.in/drtlive/paperbook.php?ri=2026487720703>

Tribunal-i kü nem tashi aser seal agüja aliba dak amendaker 05-08-2026 nü iba tetuyuba agütsür.

Registrar I/C
Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 22, 2026

Election Merüka Agiyim chichia sayuangma


- P Tiamongba Aier

Ao Baptist Arogo Mungdang (ABAM) Social Concern Ministry-i August 21, 2026 nü Impur nung "Clean Election" dak rangloker Aor Yimden Yimsüsür den mensem ka ayonga agiba ya kanga dang tongtipang lir aser iba ajanga taruba election nung langka tajung temelenshi alitsü imlar. ABAM Executive Secretary Rev. Temsü Jamir-i iba sentong nung jembidang Clean Election mapatong atema yimsüsürtem ola angadangtsü aser teka amteper Ao lima yanglutsü tangatetba lir kechiyong ABAM nung tenzükertemi yimsüsürtem dak teimla tulu angur ta shiogo. Külen, sentong nung shisalen sayur Dr. Panger Kichu-i "Election Merüka Agiyim" onük jembidang tangar kini aiben Aor-i kechi ashir ta angadanger, saka kanga dang tesasatsükaji tensa aser mapa aika nung asenokji atsükshishia jajatsü-ang akümer, aser ibaji tangar tai masü saka asenok tai lir ta shiogo. Naga lima nung election agidang mapa tamajung ajakji Aor-i tenzük, anungji ano election nung mapa tajung inyaka tajungleni melenshitsuja Aor-i tenzükdi arung ta paisa yimsüsürtem ayongzüka jembiogo. Atangji Nagaland nung election agia aruba putiotsü meyipa reprangdangra, kanga dang asükjang morongtsüsa tatalokba aika asen Ao lima nung atalokba asenok yimdangi arur. Naga nung rongnung mezünpur ta asüba Ao kin ya tajung nunga mezünpur, tamajung nunga mezünpur ta ser arudagi. Anungji tanga maparen aser wadang balala khen toktsür Nagaland nung election ya kodaser tashishitsü melii, ochishia aser tiptema agitettsü ta temelenshi tajung bener arutsü atema Aori lenmangtem bushitsüla. Nagaland nung taruba assembly elections ji Yisu marui lira 2028 küm tetenzüklen agitsü, kechiyong tang aliba sorkar kümsük ya February 2028 nung tembangtsü. Anungji iba election tashi nungjibo Naga nung nütsüng tesadang mesüra teimba katibosa tangatetba melenshir election merüka agitsüsa tang nungi danga nangri kangshir mapa tenzüksüla. ABAM-i yimten yimsüsürtem dak teimla tulu ngua parnok Impur nung jateper election merüka agitsü atema tebilembatem lemsatepogo aser iba ya kanga tongtipang kechiyong asen Aor sobaliba nung yimten ajanga senso alenbanga ayur. Ajisüaka, yimten yimsüsürtem amaji Arogo ketdangsürtem-a kanga tongtipang kechiyong arogopurtem len sayurji arogo ketdangsürtem. Arogo ka nung sannükeri anir toklang tenzükertem aser deacon temi anir tenzükertenzüklatem asoshia Clean Election ya kanga tongtipang aser parnoki anir memelenshira, amajok dang asütsü. Anungji ABAM Social Concern Ministry-i agia aruya alitsü saka maneni arogo tenzükertem asoshi shisatokden mesüra tanga sentong tajung ayonga "Election Merüka Agiyim" ya angateta sayutsü nüngdak ta ajiteter. Ajak dang tongtipangtibaji nija, ni aser na indang tangatetba lir. Yimteni özüng agüjaka, Arogoi tesayuba agüjaka, na aser ni dak Clean Election tangatetba melira, tzürong nung ken tendok ta asüba amato dang asütsü aser election arudang akhi ama votes yoka achitsü, sen meshia agitsü, tangar ashioksütsü, mepetmesü adokra nisung züksettsü/tepsettsü/yirutsütsü, tiyazü jembia tangar anisatsü. Anungji ABAM-i anir Aor yimten yimsüsürtemi Ao lima nung election agiba yimya melenshitsu, inyakyim tamajungtem agientsü, merüktettsü merangtsü apusodang asenokia parnok den amalitepa aser ajungshitepa asen tangatetba melenshitsu merangdi, aser taruba election nungibo ochishia asen senti vote enokja nübo tajungtem shimtetdi aser iba mapa tajungji tanüngba Naga kintem nem angazükdaktsüdi. ABAM Social Concern Ministry-i maneni arogo lennirtem, lokti tanishirtem, tetsür teloktem aser kaketshirtem o lanurtem den tapet sentongtem atonga "Election Merüka Agiyim" chichia sayura Tsüngremi asenok memoatsü ang malitsü ta amanger.

OLEMSABANG

Kosen ayimdang kidang anepaluyim kar

Source - Internet



Kosen dang ya Epistaxis ta-a ajar aser iba ya teti ajuruba timtem ka lir, koba kidang first aid ajanga anepaluteter.

Teni nung nep kenshiba mesüra teni telonglen takong akümba ajanga kosen ayimer. Khen khenbo teni nungi nep asükdokba ajanga-a kosen ayimer.

Teni nung blood vessels aika aliba ajanga teni nungi azü melamela alur aser kosen ayimba timba ka teni tetenzüklen nungi alur aser minute ishika lir anener. Kosen ayimba aibenbo timtem tulu majurur.

Kosen yimdaktsübatem:

- # Teni kenshiba
- # Teni yiruba
- # Yimra agi atongdang
- # Oset tila agi teni nung kenshiba
- # Allergy
- # Teni telung nung tumor
- # Teni telung nung neptzü aser mopung lenmang akongba
- # Sinusitis
- # Asükwa asüba agi

Kidang anepalutsüyim kar:

- 1: Meti nung apple cider vinegar metenang aser teni anasa yuang. Iba ya janga azü ayimba ajema kümdaktsür.
- 2: Minute 5 nungi 10 shi teni temalen (tenük ana yongtsü) nung ice pack mesüra tzü temekong yuang. Iba ya ajanga blood vessels shibangtsür aser azü ayimba anendaktsüba den teni awakba ajema kümdaktsür.
- 3: Minute 5 nungi 10 shi nü kümtsütila aser temeyong agi teni shibangang aser nü tebang ajanga tango sashiang. Iba ajanga kosen ayimba anentsü akok.
- 4: Kosen tera dang yimra, tekolak tejaklen tera angümzüka lur indangindanga menang. Iba ajanga nü terokleni azü maitsü, kechiyong azü meyokba ajanga saksünüa aitba timtem ajurutsü akok.
- 5: Nü temang nung Vitamin K meperii akümba ajanga kosen ayimtsü akok. Anungji, tarutsü nung kosen mayimtsü atema süngolio amala vitamin K aliba chiyongtsütem chiang.
- 6: Kosen noktangtsü atema Vaseline amala moisturizing ointment mesüra antiseptic nasal cream teni telunglen nüang. Kosen ayimba anenba sülen ghonda 12 shi nep tashi agi tasükdok mesüra teni telung nung kecha teinok.
- 7: Nai apple, lasüng, watermelon & piyas nung amala vitamin C aser flavonoids aliba chiyongtsütem aika achitsü merangang. Item ya ajanga capillaries tashi itdaktsür aser kosen ayimba nungi noktanger.
- 8: Teni telunglen neptzü aser mopung lenmang takong akümba ajanga kosen ayimer. Anungji, anogoshia tzü aika jemang. Ano tzü temerük nung metsü tera enoker teni telunglen enokang, kechiyong iba ya ajanga teni telung nung neptzü aser mopung lenmang tai kümdaktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Hindu leniri o meshidak jembiba Khristanpuri aitsür



Jammu and Kashmir kübok Poonch district nung aliba Baba Budha Amarnath Temple bushia anogo 12 annual Hindu pilgrimage August 17 nü tenzükbä sentong ka nung tangokba noksa ka nung rightwing Hindu group Vishwa Hindu Parishad (VHP or World Council of Hindus) lenirtem angur.

New Delhi, Luroi/August 21 (Agencies): India nung Hindu nationalist organization indang lenir kati Khristanpur aser communist forces temi Hindu nütsüng ajemdaktsütsü tasa yanglur ta shia Hindu nunger dang pei tamangba yimsü aser sobaliba wazüka ayutsü mechi tanur tali asotsü ajungshiba atema Khristan lenirtem aser activists temi aitsür.

Vishwa Hindu Parishad (VHP) mesüra World Council of Hindus indang organizing secretary Milind Parande-i August 17, 2026 nü Jammu and Kashmir nung Shri Buda Amarnath Yatra 2026 lapokba sentong nung iba o ya jembia liasü.

Shri Buda Amarnath Yatra ya küm shia anogo 12 Hindu nungertem Poonch district nung aliba Baba Budha Amarnath Temple-i pilgrimage aoba sentong ka lir. Iba tekülem ki ya Hindu nunger tsüngrem Shiva tenüng nung yanglu, kong temeshi ainlen jajar nisung meyirijang aikati semdanger.

Iba sentong nung shilem agirtem den jembidang, linük 120 dak tema Khristan kumogo aser 50 dak tema Islamic ozüng küboki aitogo, ta Parande-i ashi. "Vidharmis" mesüra tanga yimsü amanger temi India aiben amak aser Hindu nungertem küm noklang aika yimtenren tsütsü timtema aru, ta pai ashi.

Hindu nunger sobaliba aser tamangba yimsü wazüka ayutsü atema India nung Hindu nunger timba asütsüla ta ashi.

"Hindu nunger ya minority kumra, parnok sobaliba, tamangba yimsü aser yimyatam kumzüka malitsü," ta pai ashiba video tem social media nung prokshia liasü.

Parande-i Hindu nungertem dang tanur ana mesür asem bo asotsü ayongzüka aser par tamangba yimsü aser linük kumzüka ayutsü asoshi aji nüngdaker, ta shia liasü.

"Tanur ka dang süra, tera samaa aotsü," ta pai ashi.

Paisa Khristanpur aser communist telok temi nüburtem

dang national census nung Hindu nunger masü ta ashitsü ajungshir, ta pai tai tongloksü saka kuli magütsü.

Pai iba ama o jembiba ajanga Khristanpur lenirtemi aitsü aser iba ama tapi agi o jembiba ajanga kin tilatem dak temulung malem adokdaksür ta ashi.

Andhra Pradesh nungi Diocese of Nellore nung theologian, Catholic putir aser sociologist Anthony Raj Thumma-i nütsüng ainba aser tamangba yimsü maitsü amshia nüburtem mesadangtsüla ta ashi.

"India nung Khristanpur ya iba linük nung tongtipang shilem lir aser education, health care aser social welfare tsütsü küm aika mapa tajung inyaka arur. Kin kar asoshi Khristanpur ya timtem ama sayuba ya tim masü aser majung," ta pai UCA news dang ashi.

Khristanpur ya 'demographic competition' atema bilema mali aser kin mesüra tamangba yimsü telemsa makai nüburtem tenzüksü tangatetba nung lir, ta pai ashi.

(Maneni tapak 7 nung...)

ANOGO ABEN TSÜNGREM DEN

Jashiba tanüla

Pa kanga jashia timatemtsü tenzüka aser Pai parnok dang ashi, " Kü nüla tasütsü ama kanga jashir, nenok yangi liang aser saksalemang ".
Mark 14 :33-34.

Shibaibo Tsüngrem jashiba molungjang metettsü ? Temenenpurtem atema jashia bilemba aser temenenpur ka pei tai ajak nangzüka temolung meyiper Pa dangi arudang pelaba Tsüngremer molungjangji meimchir-i asadangtsü makok. Kodang Tsüngremi asenok den Pai pa molungjang nung bilemba tepela aser tejashi lemsadir, idangjiang asenoki Pa molungjang angatettsü akoker Amos 3:17. Yisui alima menen khuret ajak pongloker jashiba molungjangji nai angatettsü akok asü ? Yisu nütsüngtemia-süng Par kibuba molungjang tejashi agi sünga alibaji memeteti liasü. Saka, Pai parnok den pa timtim molungsua lemsatep. Par nütsüngtemi aiben Yisui kechi bilemer aji mangateti aru. Pai tila tanurtem anir aru saka parnoki songtem. Pai kodang menen agi kokroka nener aliba temenen-tsür ka dang imlibilem taochi sayu, parnoki mangatet. Asenoki Tsüngremi kechi bilemer aji angatettsü merangtsübaji kanga tongtimbang aser kodangsa asenoki aji angatettsü asoshi merangdanga sarasademdir, atangji Pai asenok den Pa molungjang lemsateptsü. Kodang nai Pai bilembaji angatetdir, na meküta alirtem den nai küsa Tsüngrem temeimji lemsatepnütsü, nai timtimer yarinütsü. Temenenpurtem den Yisu-i koma jembia aser inyak, küsaji nai inyaktettsü. Ibai Tsüngremer molungjang metetba aser angatetba taküm ka temaitsü.

West Bengal nung Hindu nungeri pastor ka merenshi



Protestant pastor Joy Sutradhar'er kibong West Bengal nung par kidang tangokba noksa nung angur. Tamangba yimsü melendaktsür ta tai tonglokja Hindu nunger telok kati August 18 nü pastor dak züka merenshi.

Satgachia, Luroi/August 21 (Agencies): West Bengal nung Khristanpur anema azüdokshi lendong balala ataloka aruba nung tang tesüsa hardline Hindu nunger telok kati Protestant pastor ka kidangi oa pa dak azük aser pai yimdaklirtem tamangba yimsü melendaktsür ta tai tongloksü.

Küm aika sülen tang mezüngbuba May ita state assembly election nung Bharatiya Janata Party (BJP)-i takok tulu anguba sülen Muslim aser Khristanpur densema tamangba yimsü tsütsü kin tilatem anema mapa tamajung inyakba tali akumer.

Purba Bardhaman district kübok Satgachia tesem nung

arishi küm 55 tain Pastor Joy Sutradhar kidanger August 18 nü nisung 25 shi arua liasü, ta osang ajanga ashir.

Pastor-i tamangba yimsü melendaktsüba mapa inyaker ta parnoki tai tongloksü aser pa aser par kibong dang parnok aliba kidang nungi ainshtitsü ashi aser aji mesüra timtem tulu asütsü ta shia liasü.

Telok rongnung kari pastor indang jala dang iba tatalokba indang video lai mobile phone nung tangoka aliba meindokra la dak azüksü amokmeren, ta yangji aliba Khristanpuri ashi.

Khristan lenirtemi iba lendong aitsü aser ibai tamangba yimsü temeden anema inyakba lir ta ashir.

"Ibai rara mesüba nungi masü saka asaa pastor dak inyakba lir, shiba tesüba küm 20 tashi nüburtem tenzüka aru," ta Bangiya Christiya Pariseba (Bengal Christian Council or BCP) indang founder secretary Herod Mullik-i UCA News dang ashi.

Pastor tenüng nung BCP Legal Cell ajanga ken o ka benok, saka police temi tang tashi shinga mapu, ta Mullik-i ashi.

Chancellor of the Archdiocese of Calcutta, Father Dominic Gomes-ia iba tatalokba atema jashiba lemsatepa liasü.

"Pastor Joy Sutradhar dak züka merenshiba aser par kibong merenshiba osang

angashia kanga shisabolur aser jashir," ta Father Gomes-i August 19 nü sangdong ka nung ashi.

Iba ama azüdokshi, amokmerenba aser merenshiba ya democratic aser constitutional society nung talidak maka, ta pai ashi.

"Senso ajak akumtsüboa, tetsübo makai tamangba yimsü temeden amshia alitsü temeden lir. Nisung mesüra lokti kechaia pei sasa ozüng amshitsü mesüra tamangba yimsü mechi tenük yoktsü temeden maka," ta Gomes-i ashi.

Putir-i police aser civil administration dang Pastor Sutradhar aser par kibong kumzüka ayutsü mera agitsü aser ozüng nung aliba ama bushisüngdang shidak asütsü ayongzüka liasü.

"West Bengal nung Khristanpur asoshi anogoshi tensa tamajungba akumer," ta osangbener aser All India Catholic Union indang odongtar John Dayal-i ashi.

"May ita state assembly election nung Ato Kilonser Narendra Modi'er BJP-i takok anguba sülen iba ama azüdokshi ya state tesem balala nung ataloker aser mapa tamajung inyaker temulung tali uludaktsür," ta pai ashi.

Tamangba yimsü tsütsü kin tilatem kumzüka ayutsü atema sorkari tekeraba nung mera agitsü nüngdaker, ta Dayal-isa ashi.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


Züingzük

- (v) o renema jembi, nangzük (guarantee)
* Yimnasanger yariteptsü o züingzuka jembi senshi.

Züingzük

- (v) renema azüing (finished reading)
* Ni college züingzük tashi tsüraburi yari.

OLONG PAITEP # 7606



TIPIEN

1. Tzü beshiba aou - (6)
2. Meshiyonga ao - (4)
4. Teimba aküm - (6)
7. Lai nung ainkar ka - (4)
9. Süngküm lanu - (4)
10. Tapok - (4)
11. Kisüing - (4)
14. Lai nung tanabuba kakat - (6)
15. Ani _ _ _ zük - (4)
16. Tepu meyidak - (6)

LANGTSÜLEN

1. Azüzükba shisatsü - (8)
2. Nemjema bilem - (4)
3. Tentet - (4)
5. Temechi - (4)
6. Kishi den tilaba apaba - (7)
8. Tekolok-i agütsüba - (8)
10. Yagi menemer - (4)
12. Zükolak tzü - (4)
13. Bangsemo lendok - (4)

OLONG PAITEP # 7605 TELANGZÜBA

TIPIEN:

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN:

1. Tenükjang, 2. Luden, 3. Kioktsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA



UAE nungi senior cloud engineer Pushpajothi Ravikumar-i sticky note tila nung olung balala 150 tashi zülutetba atema otsü tasen ka yangluogo. Arishi küm 29 tain Pushpajothi-i iba ya inyaktetba atema 'Most words written on a sticky note' ta Guinness World Records nung zülüokogo.

Manipur CM-i candidate 16 Japan-i apusoa yokogo



Imphal, August 21, 2026 (Agencies): Manipur Chief Minister Yumnam Khemchand Singh-i August 21 nü candidate 16 tashi apusoa yokogo aser parnok ya Japan kübok tesem balala nung overseas skill training agitsü aser mapa inyaktsü.

Manipur nung State Livelihood Empowerment and Entrepreneurship (SLEE) initiative kübok parnok 16 yok.

Chief Minister's Bungalow, Imphal nung flag-off programme agidang CM Khemchand-i candidate tem dang pei tera kodanga mamadoktsü aser

Manipuri nunger asüba atema teti nüma atangtsü ayongzük.

Paisa candidate shia nem Pena indang replica kaka agütsü, iba ya Manipur nung indigenous musical instrument ka lir.

Singapore nung nisungtemi pei national identity atema nüma atanger saka Manipur nung nisung aikati Manipuri nunger ama sayutsü nungnanger. Iba tangatetba melenshitsu aser nübottemi pei maitsü atema nüma atangtsüla ta Khemchand-isa ashi.

National Highway-2 nung Imphal-Dimapur-Guwahati

lenmang nung public transport services tenzükogo aser iba ya free movement & connectivity atema tongtipang mera ka lir ta paisa shisem.

Iba sentong nung State Bank of India (SBI) aser SLEE tsüngda MoU ka nung sign sütep aser iba ya candidate tem nem senotsü teyari agütsütsü atema lir.

Candidate 16 ya National Skill Development Corporation (NSDC) International Academy nung Japanese language training agiogo aser Tokyo, Hokkaido o Okinawa dena Japan kübok tesem balala nung mapa nguogo.

JTCM-i Naga areas nung khu abenba garitem noktanger

Imphal, August 21, 2026 (Agencies): Joint Tribes Council Manipur (JTCM) nung working committee-i Inpui, Liangmai, Rongmei aser Zeme tesemtem adena süiba national highways nung khu abenba garitem mesenzüdaktsütsü metetdaktsüogo.

Manipur state sorkari Naga nunger trok tepsetba atema mapa meinyakba aser August 20 nü Kangpokpi district nung security forces-i lungkak aiterem dak tashiyim amshiba anema iba moksang ayongogo.

Kangpokpi nung August 20 nü security forces-i lungkak aiterem dak tear gas amshiba ajanga tensa tamajungba aküm aser iba tatalokba nung nisung aika yiru ta JTCM working committee-i metetdaktsü.

Iba ken o ya National Investigation Agency (NIA) ket nung agütsüogo saka tang tashi nisung maitsü mejangjateti lir ta parnokisa ashi.

State aser Central forces-i teja repranga inyaksangshir aser osang tai nung ajemdaker Naga Village Guards dak tenük

yoka security operations inyaker ta JTCM-isa tai tongloktsüogo.

Yimdaklirtem telungpur teloktem nungi lendong ajurutsü tsübua alir saka külen ketdangsürtemi local defence volunteers anema mapa inyaker ta parnokisa ashi.

JTCM working committee-i regional coordination units aser local bodies dang iba tenokdangba tiptema inyaktsü ayongzükogo.

Ketdangsürtemi onoki ahangba ama meinyakra lungkak aitba ulushitsü ta JTCM-isa ashi.

Tripura-i 2028-29 tashi nung Lakapati Didis 3.5 lakh adokdaktsütsü

Agratala, August 21, 2026 (Agencies): Tripura sorkari financial year 2028-29 tashi nung state nung "Lakapati Didis" 3.5 lakh adokdaktsüsü alizüing yua lir aser iba ya government schemes aser programmes aika meyoakteper inyaktsü.

August 21, 2026 nü State Level Lakapati Didi Steering Committee senden ka amandang iba atema asalentong jembiogo. Senden ya Rural

Development Department Secretary Abhishek Singh menden ser amen.

Iba senden nung Tripura Rural Livelihood Mission (TRLM) CEO Tarit Kanti Chakma, mission ketdangsürtem aser government departments nungi teshimtet nübotem aden.

Iba senden nung parnok Lakapati Didi initiative inyaka aruba meyipa reprangshi aser state ajungalen programme

ulushitsü aser tashi itshitsü indangjembi.

Abhishek Singh-i 2028-29 tashi roadmap indang lemsatep aser Lakapati Didis 3.5 lakh alizüing atongtsü atema ajaki yaritepa aser amalitepa inyaktsü nenshi.

Lakapati Didi initiative ajanga rural self-help groups nungi tetsür züingsemtemi inyakyim balala ajanga küm ka nung Rs 1 lakh bosa aazütsü teyari agütsür.

NFR-i Lumding-Badarpur Hill Section indang osang metetdaktsür

Dimapur, August 21, 2026 (TYO): Northeast Frontier Railway (NFR)-i New Harangajao station anasa railway tracks (Line-1 and Line-2) alaba sülen maparen maneni inyakdar aser iba ajanga train services nung temelenshi lir.

Lumding-Badarpur Hill Section nung Line-3 ajanga dang train senzür aser iba jagi NFR-i train services nung temelenshi asüba sangdong ka ajanga metetdaktsüogo.

Cancellation of Trains:
Train No. 15617 (Guwahati - Dullabcherra) Express - 22.08.2026 nü apusotsü aliba athir.

Train No. 15618 (Dullabcherra - Guwahati) Express - 23.08.2026 nü apusotsü aliba athir.

Train No. 15615 (Guwahati - Silchar) Express - 22.08.2026 nü apusotsü aliba athir.

Train No. 15616

(Silchar - Guwahati) Express - 23.08.2026 nü apusotsü aliba athir.

Rescheduling of Trains:
Train No. 15650 (Narangi - Agartala) Express - 22.08.2026 nü apusotsü aliba Narangi nungi 18:30 hrs nung apusotsü.

Train No. 15641 (Silchar - New Tinsukia) Express - 22.08.2026 nü apusotsü aliba Silchar nungi 22:10 hrs nung apusotsü.

Taliban-i pua aliba UN staff ana chiokogo

Kabul, Luroi/August 21 (Agencies): Afghanistan nung Taliban ketdangsürtemi United Nations staff züngsem ana chiokogo. Tena ya hopta ana tejekdang apu, ajisüaka tena kechiba apu ajibo mejangja, ta UN-i ashi.

Nisung ana ya linük anüolen Herat yimti nung August 9 nü apu. UN Assistance Mission in Afghanistan (UNAMA)-i ashiba agi, tena ya Brehostibar anepdang chiok aser tenaprongla anema dang lir.

"UNAMA-i tena apuba aser sota ayuba indang formally osang magütsü aser ketdangsürtem den maneni ken o angatettepdar," ta UN-i ashiba den, tena anema ken o benoka alibatem ajak aginogo, ta shisem.

UN-isa, United Nations dak mekongshitsü aser maongka balala agütsüba ya akümtsübudaktsütsü aser United Nations aser parnok den sendaka alirtem linük kübok tesem ajak nung tekümpzükba kübok sadem sadem senzüdaktsütsü asoshi inyaktepdar, ta ashi.

Afghanistan nung Taliban ketdangsürtemi nisung aika pua aruba rongnung iba ya tesüsabuba asütsü. Taoba hopta Human Rights Watch-i ashiba agi, tetsürtem aser tanurtem temeden atema inyaka aliba local lokti tentet ka nungi staff trok ita ka dak tema samar lir.

Ken o dak sendakba nung Afghan nunger ketdangsürtemi kecha telangzüba magütsü,

Afghanistan kübok tesem balala nung UN agency tem health aser humanitarian maparen balala nung inyakdar. Linük balalai tenokdangba agütsüba aser kidanger Iran aser Pakistan nungi lisopur million aika meyipa aruba ajanga Afghanistan tang timtem nung lir.

2021 küm United States aser NATO sepaitem Afghanistan nungi atsüinginba sülen Taliban-i August 15 nü sorkar atsünga liasü.

Iba sülen parnoki tetsürtem primary school sülenbo k a k e t s h i s a t s ü mebushidaktsütsü atema tenokdangba agütsü aser tetsür mapa inyaka alirtem timba mapa nungi anentsüogo, koba alima kintemi aija arudar.

Imran Khan temang reprangba sülen tepuokdaki meyipa yokogo

Islamabad, Luroi/August 21 (Agencies): Islamabad nung aliba Shifa International Hospital nung Pakistan indang taoba ato kilonser Imran Khan temang repranga doctor temi pa tepuokdak yutettsü aser tang mozü kidang amungtsü menüngdaker ta jangjatsüba sülen tanaben Adiala Jail-i yokogo.

Pakistan indang Supreme Court-i ketdangsürtem dang ghonda 48 tsüngta arishi küm 73 tain Pakistan Tehreek-e-Insaf (PTI) tentetsang Khan ya mozüki tajung ka nung anir oa temang reprangtsü totuyuba agütsüba sülen Brehostibarnü anüngdang teroto meta Adiala Jail nungi mozü kidangi anir oa liasü.

Iba sülen Khan ya tepuokdaki meyipa arua pa indang cell nung yua lir, ta jail osang ajanga jangjatsü.

Shifa International Hospital nung specialist doctor trok-i Khan temang repranga liasü. Khan blood pressure shidak maliba, anisüngzüka melitetba, temulungjang kanga kera arakzüba, tekolak angoba aser tenük achichilen mejungi akumba osang aruba sülen pa temang ya repranga liasü.

Doctor temi temang reprangba sülen Khan mozü kidang amungtsü menüngdaker aser maneni tepuokdak yutettsü ta shitet.

Khan mozü kidangi anir aodang aser tepuokdaki anir aodang security tesashi yoka liasü.

Taoba ato kilonser arutsü lia security achayangtsü atema Islamabad Inspector General densema police ketdangsürtem arua liasü.

Maparen ajak miimshia ayatirm mapang inyaka aser temang reprangba sülena sepaitemi pa Adiala Jail tashi meiner ao.

Party züngsemtem aser kinunger temi aiben akhangba sülen Supreme Court ajanga pa mozüki tajung nung temang reprangtsü mela liasü.

Khan ya August 2023 nung apuba sülen ken o balala nung tai tonglokja tepuokdaki yokba tanü tashi mechioker. Pa tepuokdak ayuba ya Pakistan yimten ken o nung tiyongtsü ka akum aser par PTI teloki pa chioktsü khanga pa anema ken o balala benokba ya yimtenren tsütsü nungi tenük yokba lir ta aitsür.

Iran-i US nem telangzüba tesashi agütsütsü nangzük

Dubai, Luroi/Augst 21 (Agencies): Iran-i Hokolbarnü ashiba agi, US-i asendenshir parnok amokmerenba atema telangzüba tesashi agütsütsü. Iran nunger lenirtem atsüngtoktsü nükjidong nung Washington-i puti otsü nung tang mezüngbuba rongsenketzü dang sendakba nung tenokdangba tesashitiba agütsütsü ta shiogo.

Tenokdangba agütsütsü atema Washington renemba mapang U.S. Treasury tekolakba Scott Bessent-i ashiba agi, pai osang tejangja Hombarnü metetdaktsütsü.

Tir Donald Trump-i taoba mapang, Iran nem teyari agütsürtem nem rongsenketzüng nung tenokdangba tesashi agütsütsü ta shiogo.

Iran Armed Forces chief of staff Major General Ali Abdollahi-i ashiba agi, Islamic Republic-i telangzüba tesashi agütsütsü.

"Ali, tzüyim, anüng, air defence aser cyberspace nunger ajak nung Iran indang armed force temi tsükchirtem nem telangzüba tesashi agütsütsü," ta Abdollahi-i ashiba Iran nung media sangdong balala ajanga metetdaktsü.

Iran indang parliament speaker, Mohammad Baqer Qalibaf, shiba United States den sensaksemertem rongnung tongtiba lir, pai ashiba agi sepaitem yoka raraba ajangabo takok mongutettsü ta Washington-i yimdangi arur ama reprangteter.

"Tamendakdak makai tenokdangba balala agütsüba anema sentong yanglutsüla, ajita asünungdang iba ya koktettsü," ta pai Iraq nung ashiba den pai rongsenketzüng nung tenokdangba balala agütsüba atema US aser Israel na aija liasü.

February ita rara tenzükba sülen nisung meyirejang aika süogo aser Iran-i Strait of Hormuz nung rongtem amakba ajanga alima ajunga nung totzü jenjang tali kümogo.

Brehostibarnü Strait of Hormuz ajanga khu abenba rong tenet dang süiaogo. Rara metenzük tsüngda iba tzü lenmang ajanga anogo nung rong 130 süia liasü.

U.S. aser Iran nati April aser June ita anabenbo ceasefire sangdongogo, ajisüaka takok ngua mebenoktet.

1979 küm Islamic Revolution sülen küm 50 shi Iran nem rongsenketzüng nung tenokdangba agütsür arudar, aser iba ajanga nüburtem timtem tekangshi nung lir.



Office Of The

Soyim Gazetted Officers' Association

Hq. Ungma, Mokokchung, Nagaland

TENÜNGSANG AGÜTSÜR

Wt. Imtinungla Longkumer, NCS, EAC, Satakha, Government of Nagaland ajanga Independence Day, 2026 nung Governor's Commendation Certificate ngutetba atema SGOA-i tenüngsang agütsür. Nai bendanga agütsür temulungtetba tulu nung tatishitsü tajung sayuteta tenzükba temaitsü iba konang ya agütsü. Tsüngrem nem tenüngsang agütsür aser tarutsü nunga nai ano konang tali ngutettsü sarasademtsür.

Sdl-

(Er. Imtitushi Jamir)

Secretary, SGOA

Office of the

Chungtiatsür Telongjem Mokokchung Town

TENÜNGSANG AGÜTSÜR

Chungtiatsür Telongjem Mokokchung Town ajanga Mrs. Sashimenla (D/o Mr. & Mrs. Waisangba) UDA Office of the Deputy Commissioner & District Election Officer, nübur tenzükba wadang nung nendaka aser mulungsüa inyaketba ajanga 80th Independence Day 2026 nung District Commendation Award ngutetba asoshi tenüngsang aser tepela lemsateper.

Tsüngremi tarutsü nung ne wadang aser sempet tali nübur asoshi moajang ta CTMT sarasadem.

Sdl-

Mrs. Temsurenla

President

Sdl-

Mrs. Imkongtula

General Secretary

PUBLIC NOTICE

 **ICICI Bank** Registered Office: ICICI Bank Tower, Near Chakli Circle, Old Padra Road, Vadodara- 390007
Corporate Office: ICICI Bank Towers, Bandra-Kurla Complex Mumbai- 400051.

GOLD AUCTION & INVITATION NOTICE

Tsünglanglen tenüng agüja alir Borrower(s) dang ICICI Bank Limited nungi gold ornaments amshia loan agia aliba menoktsü metetdaktsü.
Sen tagütsütsü aliba magütsütem nung, züngzüktepa aliba gold ornaments ya September 21, 2026 nü auction asütsü. Sen apuer sür alinungbo, Terms and Conditions ya senmanger den kasa alitsü.

Loan A/C No.	Borrower Name	Auction Branch Address
Branch Name: Dimapur		ICICI Bank Ltd., H No. 586, Dhoibala Road, Dimapur, Nagaland - 797112
047657000053	Jayanta Saha	

Auction ya tekalen table nung shia aliba address/es & anogo alitsü.
Mapang: 3.00 P.M. -6.00 P.M.
Auction anogo/tesem/auction yimyatem jelia osang magütsüi melenshitsü ICICI Bank dak temeden lir. Jangra alirtemi tekalen shia aliba Branch/es nungi auction indang Terms and Conditions tejangja angutsü.
Date : 22.08.2026
Place : Dimapur

Sincerely, Sdl/- Authorised Signatory
For ICICI Bank Limited

Hindu leniri o meshidak... (Tapak 5 nungi...)

"Kanga alia aoba Hindu yimsü balala amangertem dak nunger telok temi Hindu vote 'fertility rates' ajema akumba bank lungjemdaktsütsü sayur.

tebilemba lir aser nüburtem New Delhi nung alir census tsüngta telemsa adokdaktsütsü expert Milan Soni-i ashiba agi, atema teti lenmang angur. India indang tamangba yimsü Parnok political agenda ka lir, nung ajemdaker nütsüng aser iba yongji parnoki iba ama lemsaba melenshitsü meranger tesüngmangtsü o jembir," ta ta jembiba bhukumtsüsa kuli putiri ashi. kangabo mali.

Parande-i jembiba o ya "Nütsüng yongsük ajanga Hindu nationalist melenshiba ya loktiliba aser movement indang telok kari rongsenketzüng dak keta lir. Kin kari miima kin kar melentsü demographic temelenshi ya tasa amshiba data-i mashir," ta India nung national census nung natemsaba ya 2011 nung agia liasü aser Covid-19 pandemic mechi 2021 census thinen.

India nung Hindu nunger asoshi tebilemtsü asütsü ta angatetba indang sayur ta aikati ashir. Census tasenba tenzükogo aser nütsüng züngdangba maparen ya February 2027 tashinung tembangtsü imlar.

Parande-i jembiba nungya Khristanpur ya Hindu radical telok temi demographic mesüra sobaliba realities indang masü identity timtem ama aiben athishiba politics den sendakteper. Iba ajanga tamangertem temulung ama o yagi sobaliba samatsü nung anisüngzük makar, ta Jammu nungi Catholic lenir kati tetsübo nung nüburtem ashi.

"Nütsüng yongsük indang jembiba ya aiben demographic realities indang masü identity politics den sendakteper. Iba mereprangi lokti asoshi anidentsü meranger," ta pai inyakner," ta leniri UCA News shi lir. dang ashi.

India nung nütsüng yongsük 1.4 billion aliba nungi shilem 80 Khristanpuri parnok dak tenük shi Hindu nunger lir, ta sorkar yoker ama bilemer. Onoki ozü indang data ajanga ashir. liner aser temulung melemteti Muslim nunger shilem 14 shi Muslim nunger shilem 2.3 aser Khristanpur shilem 2.3 ashi.

Demographic studies nung

World C'ship: Treesa Jolly-Gayatri Gopichand na semi tongogo



Luroi/August 21, 2026

(Agencies): India tsürtem rongnungi nungtugu badminton tetsür tarep asayar Treesa Jolly aser Gayatri Gopichand Pullela nati Hokolbarnü quarterfinal asaya koka tang asaya aliba BWF World Championships nung medal kabosa angutsü jangjaogo.

Küm 15 tejakdang Jwala Gutta aser Ashwini Ponnappa nati iba asayamung nung bronze medal anguba sülen tang

mezüngbuba India tsürtem rongnungi tenati medal ka angutsü jangjaogo.

Quarter asaya nung Treesa aser Gayatri nati kanga meranga asayar China tsür Jia Yi Fan aser Zhang Shu Xian na 16-21, 21-15, 21-13 agi koka semifinal tongtetogo.

Iba asaya makok tsünga Treesa aser Gayatri nati China tsür la ana ya khen danga koker maliasü.

Mezüngbuba game nung

Treesa aser Gayatri na 1-6 agi tesülen liasü saka point trok atonga anguba sülen point ya 8-9 aküm, saka China tsür la ana yagi tajungba asayateta mezüngbuba game bo kokatok.

Tanabuba game nunga Zhang aser Jia nati tajungba asaya tenzük aser 10-7 agi tena tejakdang liasü, saka Treesa-Gayatri nati kanga meranga asayar 13-10 agi tejakdang aküm.

Iba sülen India tsür la ana ya ano 14-15 agi tesülen liasü, saka point pong atonga anguba sülen tena 19-15 agi tejakdang aküm aser iba sülenbo asaya amokbanger asaya-a asaya akok.

Decider nungbo Treesa aser Gayatri nati tajungba asaya-a tenzük aser break tashi nung tena 11-5 agi tejakdang liasü. Iba sülen tena China tsür la ana nem ya tena menepdaksütsü atema kecha maongka magütsüi asayayonga tur asaya 21-13 agi kokatok.

Indian Super League ita ka agi thinener

Luroi/August 21, 2026

(Agencies): Indian Super League (ISL) September 4 nü tenzüksü liasü, saka ita ka thinenba sülen October 6 nü tenzüksü.

League ya September 21 nungi October 6 tashi nung FIFA international window tembangba sülenang tenzüksü.

League atema fixture mapang tatsüka tsünga sangdongtsü imlar.

Indian Football League 2025-26 champions Diamond Harbour FC puri atakzükja aliba anogo, koba Bodhbarnü liasü iba anogo tashi nung participation fee tanabuba instalment lakh 55 magütsüetba sülen ISL taruba season nung team 13 dang asayatsü. Indian Football League 2025-26 akokba sülen iba team ya ISL nung asayatsü atema maongka nguteta liasü.

"FIFA window sülen October ita-ang ISL tenzüksü akok," ta All India Football Federation (AIFF) nungi

ketdangsür kati Bodhbarnü PTI dang ashi. "Taküm ISL nung team 13 asayatsü," ta ketdangsür yagisa shisem.

Club 14 pronglai August 14 nü tashi nung participation fee sen crore 1.1 nungi tanabuba instalment agütsütsü nüngdaka liasü. Diamond Harbour nem taah agütsütsü atema Bodhbarnü tashi mapang apulokja liasü.

Jamshedpur Football Club-i parnok indang stake ajak Churchill Brothers dang ayokba sülen Goa nung amendaker aliba club yagi taruba season atema August 14 nü tashi nung participation fee crore 1.1 agütsüiogo.

Jamshedpur FC-i ISL nung masayatsü atema telemtetba agi aser July 31 nü parnok indang first team loksaja liasü. Participation fee mezüngbuba instalment lakh 55 agütsütsü atema atakzükja aliba mapang tembangba sülen ghonda ishika dang lir parnoki iba osang sangdonga liasü.

Spurs-i Savinho atema £75m agütsütsü mulunga agizükogo



Luroi/August 21, 2026

(Agencies): Tottenham-i Manchester City nungi winger Savinho pound million 75 agi alizüksü mulunga agizükogo aser iba den add-ons pound million 10 agütsütsü akok.

Arishi küm 22 tain Savinho ya Spurs den mapang talangka atema tenangzüktepba meyangu tsünga tamang temang tendangtsü anunga lir.

Brazil nunger asayar ya Tottenham puri joko ita 12 shi alitsü atema meranga arudar. Pa atema taoba küm lemluwa bid asüba takok monguteti liasü.

Savinho-i City nungi dang asayanüa liasü, saka taoba season Pep Guardiola kübok pa aibenbo masayatet aser Premier League nung tenetben dang tetenzük nungi asaya liasü.

Midfielders Mateus Fernandes West Ham nungi aser Sandro Tonali Newcastle nungi pound million 185 entoka alizükba sülen Tottenham head coach Roberto de Zerbi-i tang forward asayartem akangshitsü merangdar.

Ajisüaka Spurs pur sen entokba idakidangbo manentsü imlar, kechiyong source balalai

BBC sports dang ashiba agi, parnok Savinho indang City team-mate Omar Marmoush-a alizüksü atema tang sensak tesemdak lir.

Egypt nunger forward ya 2025 küm Eintracht Frankfurt nungi pound million 59 agi alizük, saka pa taoba season City nungi junga masayateti liasü.

Maneni Spurs puri Liverpool forward Cody Gakpo alizükner, ajisüaka Marmoush aser Savinho na alizükba den Netherlands nunger attacker ya alizüksü atema senotsü entoktettsü mintoktettsü mejangja.

Savinho alizükba sülen Spurs pur tang transfer window nung ajak senteper pound million 300 dak tema entoktsü. Ajisüaka parnoki Cristian Romero, Djed Spence aser Luka Vuskovic nunger pound million 140 shi agi yokogo.

Tottenham pur Premier League nung mezüngbuba asaya Honibarnü Brentford den asayatsü aser City pur Deobarnü Bournemouth den asayatsü.

Cincinnati Open: Iga Swiatek semifinal-i iogo



Luroi/August 21, 2026

(Agencies): ATP-WTA Cincinnati Masters tetsür kija asaya nung Brehostibarnü Elena Rybakina tenüklang yiruba ajanga masayatetsüsa akümba sülen Iga Swiatek semifinals-i iogo.

Rybakina iba asayamung nung masayatetsüsa akümba ajanga pa US Open nung asayatetsü masayatetsü mejangjai kümogo, koba anogo 10 lir tenzüksü.

Cincinnati quarterfinal nung 4-1 agi asaya mekoki aliba mapang Rybakina ajungbena asaya anen aser la indang trainer den sensaksema liasü.

Iba sülen la meyipa ia asaya saka point ka dang asayaba sülen masayatetsüsa aküm.

"Tatalokba ngua ni mesüngjemteti aküm. La junga dang alitsü amanger. Health ya ajak dang tongtibangtiba lir," ta Swiatek-i ashi.

"Iba ya tongtibang asayamung ka saka US Open jibosa US Open lir. La iba asayamung atemabo renema

alitsü imlar," ta laisa shisem.

Rybakina Cincinnati nung final tonga asayara la indang career nung tang mezüngbuba No. 1 asayar küm la, kechiyong temaba jenjang nung alila Aryna Sabalenka arishi küm 20 tain Sara Bejlek-i tsükdaktsüiogo.

Swiatek semifinal nung Jessica Pegula den asayatsü, shibai Amanda Anisimova 6-2, 4-6, 7-6 (7/4) agi kokogo.

Arishi küm 32buba nung Pegula-i WTA nung otsü tasen yangludar. La ya 2009 küm nungi tang tashi nung arishi küm 30 ajungba sülen Masters 1000 quarterfinals pongu mesüra iba dang timba tongtetba asayar pezübuba kümogo. Li Na, Serena Williams aser Svetlana Kuznetsova nungeri dang iba alizüng tongteta lir.

Kasa asayamung tebur kija asaya nung Flavio Cobolli-i 2-6, 6-3, 6-4 agi Tommy Paul koka semifinal tongtetogo.

Cobelli taruba asaya Arthur Fils den asayatsü, shibai Thiago Tirante minute 64 nung dang 6-3, 6-2 agi kokogo.



Italy nung Serie C tenzüksü lia Brazil nungi football asayar tejen Ronaldinho airport nung anenli tangokba noksa nung angur. Ronaldinho ya Serie C nung Ravenna FC nungi asayatsü June ita contract zülutepa lir, kong pa technical coach ka ama aser asayar ka ama alitsü.

BILEMDANGANG

"Shisakari dena ano aika memetetjem."